



Anwar diiringi Dr Zaliha mendengar pembentangan konsep Kota MADANI di Putrajaya, semalam.  
(Foto Pejabat Perdana Menteri)

# Kota MADANI fokus kemudahan menyeluruh

BERITA HARIAN 04 JUN 2025

M/S: 2

Infrastruktur dibangunkan dekat kawasan perumahan, tepati prinsip kemampanan

Oleh Muhammad Yusri Muzamir  
yusri.muzamir@bh.com.my

**Kuala Lumpur:** Konsep Kota MADANI menekankan kemudahan asas yang menyeluruh dan berpusat demi kebajikan rakyat, kata Datuk Seri Anwar Ibrahim.

Perdana Menteri berkata, ketika sesi pembentangan konsep itu, beliau dimaklumkan antara kemudahan yang dirancang termasuk sekolah menegak serta institusi Pendidikan Latihan Teknikal dan Vokasional (TVET).

Selain itu, katanya, institusi

kewangan, klinik kesihatan, balai bomba, balai polis dan masjid yang semuanya akan dibangunkan berdekatan kawasan perumahan.

“Fasa pertama membabitkan pembinaan sekitar 3,000 unit kediaman dan sebuah sekolah menegak, dijangka siap dan beroperasi sepenuhnya menjelang hujung 2027.

“Reka bentuk masjid dan sekolah akan menampilkan unsur budaya tempatan, sejajar usaha mengekalkan seni bina dan warisan.

“Semoga segala perancangan ini berjalan lancar dan dapat dilaksanakan dengan sebaik-baiknya demi manfaat bersama,” katanya menerusi hantaran di media sosial semalam.

## Dibina secara vertikal

Sementara itu, Menteri di Jabatan Perdana Menteri (Wilayah Persekutuan), Datuk Seri Dr Zaliha Mustafa, berkata Kota MADANI dengan keluasan 41.28 hektar bakal menempatkan 10,000 unit kuarters untuk lebih

30,000 penduduk dan dibina secara vertikal dengan kepadatan tinggi.

Beliau berkata, reka bentuknya mengintegrasikan teknologi kecerdasan buatan (AI), prasarana digital berkecekapan tinggi dan sistem mobiliti hijau.

Katanya, ini menjadi asas kepada bandar rendah karbon bagi menepati prinsip kemampanan, kesejahteraan dan keselamatan awam.

“Pembangunan ini pelaburan strategik jangka panjang dalam merangka masa depan Putrajaya sebagai bandar contoh yang mendukung nilai MADANI dan selari visi Bandar CHASE (Bersih, Sihat, Maju, Selamat dan Mesra Alam).

“Insya-Allah, majlis pecah tanah dijadual berlangsung pada 26 Jun ini.

“Terima kasih Anwar atas keyakinan dan pandangan bernas dalam memperhalusi hala tuju strategik Kota MADANI sebagai pencetus pembaharuan ruang bandar lebih manusiawi serta progresif,” katanya.